

Ad søknad om bygdeutviklingsmidlar

Viser til omtale i VP der det går fram at kommunedirektøren har tilrådd avslag på stønad til flygel. Han uttaler at flygel er eit fast og naturleg inventar i kyrkja og ein del av vanleg drift. Han uttaler og at «kyrkja er ein stor organisasjon med eigne budsjettmidlar» og at «bygdeutviklingsmidlane i større grad er meint for ideelle organisasjonar og friviljuge lag». Han meiner «det bør søkjast andre kjelder ...».

Litt om historia bak kjøp:

Flygelet vart kjøpt etter innspel frå musikkmiljøet i bygda. Kyrkja har svært god akustikk og er godt eigna til musikalsk framføring, men pianoet var ikkje funne godt nok. Ein lokal musikar ønska å selje eige flygel, og soknerådet sin flygelkomité, inkludert organist, fann det særst godt eigna. Seljar var tolmodig og venta ei stund, men hadde etter kvart trong for å få det selt. Det vart derfor til at det vart privat finansierte i påvente av andre midlar.

Kyrkja har ikkje midlar til eit slikt innkjøp. Fellesrådet skal dekke vedlikehald av kyrkjebygget, men har for lite midlar. Sakristi, våpenhus, konfirmantrom, gong og toalett i Vaksdal kyrkje er siste år pussa opp på dugnad. Fellesrådet har dekkja ein god del av materielle utgifter til maling og liknande. Det kyrkja elles dekker er dei tilsette sine lønningar, prest, organist, trusopplærar, kyrkjetenar. Dels har folk i frå soknerådet vikariert som kyrkjetenar gratis. Her er 7 kyrkjer og relativt få tilsette i Vaksdal. Soknerådet sine gjeremål er frivillig aktivitet, sjølv om det er valde medlemmer. Midlar kjem uavkorta frå ofringar og frivillige gåver. Slik lagar vi mellom anna kyrkjekaffi, måndagstreff med ein kaffikopp, servering til bibeltimar, juletreff, tilstelling for 50 – og 60års konfirmantar. Soknerådet bidreg og i konfirmantarbeidet og i trusopplærar sitt arbeid. Kyrkja var og representert på «Frivilligdagen» i Turbinen 5/11-22.

Flygelet i Dale kyrkje er det og soknerådet der som har stått for - ikkje kyrkja sentralt. Det vart i stor grad finansierte ved søknader til lokalt næringsliv.

Vaksdal sokneråd har sendt mange søknader m.a. til lokalt næringsliv, bank og liknande. Vi har motteke eitt bidrag på kr. 2000,- frå ein lokalt næringsdrivande.

Ordning med OVF – midlar (frå Opplysningsvesenets fond) som ein kunne søke på, vart det slutt på i løpet av siste året. Vi kjenner ikkje til andre ordningar vi kan søke til.

Soknerådet har til no fått inn ca. 65% av midlane som trengs for å kjøpa flygelet. Kommunen har gjeve tilsegn om kr. 5000,-. Soknerådet har selt eit prospekt frå det gamle orgelet, noko som gav kr. 12.000. Elles er midlane frå konsertar, ofringar og frivillige gåver frå privatpersonar.

Soknerådet fekk tilbod om å arrangere konsert i Vaksdal kyrkje med klassisk musikk ved pianist og cellist til sumaren. Soknerådet valde å takka nei då vi var svært usikre på om billettinntekter ville kunne dekkja honoraret til muskarane.

Leiar og nestleiar i Vaksdal sokneråd vil peike på:

- 1) At mykje av arbeidet i soknet i realiteten er frivillig arbeid sjølv om det handlar om «Den norske kyrkje».
- 2) At flygel ikkje er eit naturleg fast inventar i kyrkja. Som eit tillegg til kyrkjeorgelet vil flygelet bidra positivt både under kyrkjelege seremoniar, gudstenester og til kulturlivet i bygda. Vaksdal kyrkje var bygd i 1933 og har fram til no hatt piano, ikkje flygel.
- 3) At soknet ikkje har eigne budsjettmidlar til innkjøp av flygel.
- 4) Innkjøp av flygel til Vaksdal kyrkje er ei investering for framtida som vil kunne bidra til **utvikling** av mellom anna musikk og kulturliv.